

A Confederación Intersindical Galega (CIG), o Sindicato Nacional de Comisións Obreiras de Galicia (CCOO), o Colexio oficial de Traballo Social de Galicia (COTS) e o Sindicato Labrego Galego (SLG-CCLL) denuncian que a Xunta vai a entorpecer e dilatar, unha vez máis, a atención á dependencia en Galicia

A Xunta de Galicia limita a participación do Consello Galego de Benestar Social reducindo as súas funcións

Compostela, 19 de Novembro 2024. As mencionadas organizacións, que fan parte do **Consello Galego de Benestar Social (CGBS)** e no que levan anos denunciando as **malas prácticas** da Xunta de Galicia no funcionamento do dito órgano consultivo, queremos denunciar agora outra máis, agochada na **Lei de medidas fiscais e administrativas que acompaña ao proxecto de Orzamentos da Xunta de Galicia para 2025**.

Unha vez máis o Goberno galego utiliza unha “lei ómnibus” para **cambiar pola porta de atrás leis e normas moi importantes para a vida dos galegos e as galegas** como son as que nos ocupan: a *Lei 13/2008 do 3 de decembro, de Servizos Sociais de Galicia* e o *Decreto 142/2023, do 21 de setembro, polo que se regula o procedemento para o recoñecemento da situación de dependencia*.

Galicia é a comunidade autónoma, segundo os datos do Imsero a 30 de outubro deste ano, que ten menos solicitudes por persoa potencialmente dependente. Dito doutro xeito, **de cada 100 persoas potencialmente dependentes en Galicia só hai 18 solicitudes, a cifra máis baixa do Estado**, moi lonxe de Andalucía con 41 ou Castela-León con 39. **A falta de medios humanos e as continuas modificacións na normativa van na liña contraria de incrementar e mellorar a atención ás persoas dependentes.**

Por iso, rexeitamos a inclusión dunha nova modificación da norma que se fai, por riba, **pola porta de atrás no debate dos orzamentos para furtar a democrática participación da cidadanía tanto directamente**, pois non se dá publicidade á tramitación nin se poden facer achegas en fase de exposición, **como nos ámbitos onde a sociedade está representada como o Parlamento ou o CGBS.**

A modificación normativa busca unificar os procedementos de recoñecemento da situación de dependencia e do recoñecemento do grao de discapacidade, posibilitando tramitar e resolver ambos de xeito conxunto, **recortando inversión en persoal, eliminando persoal especializado de Traballo Social e sobrecargando, unha vez máis, os Servizos Sociais Comunitarios.** Isto provoca, ao o noso entender, as seguintes cuestións que consideramos problemáticas:

- Que a solicitude para o **recoñecemento da situación de dependencia** poda solicitarse nun **único procedemento co recoñecemento do grao de discapacidade.**
- Que a **asistencia para cumprimentar e presentar a solicitude** deberá recaer no **persoal das Administracións Públicas** que xa teñen esta función encomendada en

calquera outro procedemento administrativo.

- Que a **tramitación prioritaria nos casos de emerxencia social non teña en conta valoración social realizada por un/ha profesional do Traballo Social mediante a elaboración dun Informe social motivado.**
- Que a aplicación do **baremo debe ser unha función exclusiva dos Servizos Sociais Especializados** e, concretamente, dos Equipos Técnicos de Valoración, que deben ser reforzados e **non sobrecargar ás profesionais de Servizos Sociais Comunitarios.**
- Que **non se concreta a titulación requirida** dos/das profesionais que conformarán os Equipos de Valoración, en contra do regulado na actualidade.
- Que **o único informe que pode valorar a situación de dependencia ou discapacidade é o Informe Social elaborado por profesionais do Traballo Social**, non informes emitidos por Servizos sociais como se referencia na norma.
- Que o **Programa Individual de Atención** debe ter en conta as **expectativas ou necesidades da persoa interesada e a valoración** realizada polas profesionais do Traballo Social nas súas intervencións. Do mesmo xeito, debe quedar garantido o **carácter prioritario dos Servizos fronte as libranzas.**

Cuestións coma estas, relacionadas coa a atención a dependencia, vimos **denunciándoas de xeito habitual nas reunións do CGBS e facendo propostas para a súa mellora.** Desde hai anos vimos solicitado de maneira reiterada, a necesidade da crear un **grupo de traballo para analizar a situación na que se atopa o Sistema de Atención á Dependencia en Galicia**, para poder compartir os problemas detectados dende os distintos ámbitos nos que traballamos e facer achegas para melloralo. **Por parte da Consellería fai tempo que se aceptou esta proposta pero nunca se levou a cabo**, e vemos como se **lle segue a dar largas mentres que as persoas dependentes seguen agardando por unha valoración e ou unha axuda ou servizo.**

Pero isto non é máis que o reflexo da **falta de interese da Xunta de Galicia en que o CGBS desenvolva as funcións que lle corresponden como o órgano colexiado superior consultivo e de participación do sistema galego de servizos sociais**, que son, entre outras:

a) Avaliar a planificación e xestión dos servizos sociais.

b) Informar, no ámbito material dos servizos sociais, os proxectos de planificación e programación, así como os anteprojectos de leis e os proxectos de normas regulamentarias que se diten en execución de leis na devandita materia.

c) Emitir ditames, a instancia do Parlamento de Galicia, no ámbito dos servizos

A realidade é que o CGBS non desenvolve as anteditas funcións e se limita a ser receptor da información que a Consellería de Política Social remite e a emitir un informe previamente elaborado por esta sen contar coa opinión das partes que o conforman para a elaboración do mesmo.

Coa Lei de Acompañamento a Xunta dálle unha volta de torca ao papel consultivo do CGBS e **“dá carta de legalidade” á participación restrinxida que se practica e limita a súa capacidade de opinión a aquelas cuestións relativas aos servizos sociais que a Consellería considere cernando a posibilidade de opinar sobre as políticas, leis e normas**

relativas aos servizos sociais como se podía facer ata o de agora ao modificar as funcións no seguinte xeito:

b) Emitir ditames no eido dos servizos sociais, por instancia da consellería competente en materia de servizos sociais.»

En resumo, a Lei de Acompañamento vai supoñer un **novο retroceso na atención ás persoas dependentes en Galicia e vai a restrinxir a participación da sociedade civil no eido dos servizos sociais.**

Santiago de Compostela, 19 de novembro de 2024